

**“Ne možete potrošiti
kreativnost.
Što više je koristite,
više je imate.”**
Maya Angelou

NOVOSTI

KID`S FESTIVAL

Fondacija Hastor je i ove godine učestvovala na 13. Kid's festivalu koji se održao od 03. do 06. juna 2016. godine. Naši stipendisti su organizovali kreativnu radionicu pod nazivom „Moja kuća iz snova” gdje su djeca imala priliku da pokažu svu svoju maštovitost i da se pri tom zabave.

Ovogodišnji Kid's festival održan je na Trgu Alije Izetbegovića, Domu Oružanih snaga BiH i u Umjetničkoj galeriji BiH. Za četiri dana ovog djeci dragog događaja predstavljeno je dosta



radionica, animiranih filmova kao i drugih sadržaja koji su im zasigurno izmamili osmijeh na lice. Tako su i naši stipendisti napravili dobru atmosferu za mališane i razveselili ih svojom kreativnom radionicom na temu Moja kuća iz snova.

Tom prilikom najmlađim posjetiocima pomogli su da naprave svoju kućicu ili dvorac u koji su poslije dodavali namještaj po svojoj želji, a djeca nisu krila oduševljenje. Ovaj događaj iz godine u godinu okuplja sve veći broj najmlađe populacije koji ima za cilj da osim zabave pruži mališanima i priliku da nauče nešto novo, pokažu svoju kreativnost, kao i da steknu nova iskustva i prijateljstva.

Fondacija Hastor će i u budućnosti biti dio sličnih projekata i nastojati da i dalje usređuje djecu, kao i da podstiče mlade na edukaciju i razvijanje vještina.

Sadžida Kosovac



“Osvrnite se na dan na čijem kraju ste se osjećali izuzetno zadovoljni. To nije dan kada ste se izležavali i niste radili ništa; to je dan kada ste imali mnogo stvari da uradite i sve ste završili.”

Margaret
Thatcher

NOVOSTI

IFTARI ZA STIPENDISTE

U mjesecu Ramazanu Fondacija Hastor je organizovala iftari za svoje stipendiste u nekoliko gradova. Iftari su organizovani u Brčkom i Tomislavgradu (26.6.), te u Srebrenici (27.6.). Stipendisti su bili veoma iznenađeni ovom idejom i veoma rado su odlučili prisustvovati iftaru. Iftaru su prisustvovali i neki od roditelja naših stipendista, a domaćin iftara bio je Seid Fijuljanin, direktor Fondacije Hastor.



/ STIPENDISTI

AHMO MEHMEDOVIĆ

U rubrici Stipendisti predstavljamo vam Mehmedović Ahmu, koji se u proteklom periodu naročito istakao zahvaljujući svom volonterskom radu, a stipendisti koji kontinuirano rade na unapređenju svojih lokalnih zajednica svakako da su vrijedni isticanja.

Mehmedović Ahmo, druga godina Filozofskog fakulteta u Tuzli, ponosni stipendista naše Fondacije punih deset godina. Stipendista čije je isticanje vrijedno spomena. Trenutno volontira sa sedamnaest učenika u Srednjoškolskom centru

Srebrenica. Od malena se bavi humanitarnim radom i dodaje kako je u ovom području postigao puno toga. Trudi se da svaki mjesec djeci priušti zanimljive sastanke. Najveći uspjeh postigao je u saradnji sa udruženjem Sara Srebrenica, gdje je uz mnoštvo aktivnosti poslao četvero najboljih učenika sa kojima volontira na odmor od deset dana. Sljedeća u nizu aktivnost koju planira je memorijalni turnir u Sućeskoj, 24. jula, kojoj je Fondacija Hastor glavni partner. Ističe kako uz Fondaciju Hastor ima potpunu podršku, proširuje svoje vidike, stiče nove navike te uživa u radu sa djecom. Ahmo je stipendista koji svakako predstavlja pozitivan primjer našim mladim generacijama.



Hanka Mujkić

URADI SAM

U ovoj rubrici naša stipendistica Sadžida Kosovac pokazat će nam kako da od starih stvari kao i stvari koje vam više nisu potrebne napravite nešto što će krasiti vaš dom ili služiti u druge svrhe. Ovoga puta Sadžida će vam pokazati kako da ukasite tegle i dati vam prijedloge za njihov

Potreban pribor i materijal: tegla, ljepilo, makaze, platnene vrpce, stikeri, tempere, bojice, i sve što mislite da se može iskoristiti.

Postupak izrade:



01 Potrebno je da tegla bude prozirna, odnosno da na njoj nema naljepnica. Njih ćete se najbrže riješiti ako se tegle budu kuhale u vodi, a pored toga će postati i sterilne pa ćete u njih moći staviti i namirnice, kao i zasaditi začine. Ja sam odlučila da svoju teglu ukasim kako bih je napunila korisnim savjetima i porukama mojoj prijateljici za rođendan, također ću u tu teglu staviti i čokoladna jaja i bombone.



02 Prvo sam zavezala vrpču oko tegle i napravila mašnu.



03 Kako se ne bi vidjelo da je tegla od meda, ofarbala sam bijelom temperom i ostavila da se osuši 1 sat.



04 Za to vrijeme sam napisala savjete i porukice i napravila zvjezdice i druge oblike od papira kojim ću napuniti teglu.



05 Na teglu sam nalijepila razne stikere i na poklopac rođendansku čestitku, poslije čega sam u nju stavila željeni sadržaj.

U tegle koje napravite možete staviti i kolačiće, zasaditi u njih začine, staviti školski pribor, kao i napraviti mini terarij koji sam ja također napravila.



Ovo je odličan način kako da se zabavite, a da pri tome napravite nešto korisno za sebe.



**„Ono što smo napravili za sebe umire zajedno sa nama;
ono što smo učinili za druge ostaje besmrtno.”**

Albert Pike

/ UČITELJEV KUTAK

U toku ove školske godine prispjelo je 1262 zahtjeva za dodjelu stipendija Fondacije Hastor. Odbor Fondacije Hastor se dogovorio sa direktorom Fondacije Seidom Fijuljaninom da se u toku Ramazana posjete porodice čiji su učenici kompjuterskom obradom podataka osvojili pet i više bodova, kojih je 756. Kako je brojnost porodica koje treba obići velika, Seid je odlučio da angažuje i administrativce Amelu Dedić i Nedima Tuće. Napravljen je raspored ruta, a zatim se krenulo na teren.

Obilazili smo opštinu po opštinu. Fadila i ja smo prvo krenuli u Visoko, Kiseljak, Fojnicu i Busovaču. U svaku kuću uđemo, porazgovaramo sa prisutnima da bi saznali od čega i kako žive. Porodice koje tražimo najčešće su krajnji zaseok, zadnja kuća. Kako je kuća najčešće na osami „ne isplati se” postavljati asfalt i dovoditi struju radi samo jedne porodice. A u kući da trn povučesh ne bi imao za šta zapeti. U tim kućama najčešće nema struje, pa onda ni televizijskog prijemnika ni zamrzivača, ni usisivača. A djece četvero, petero u porodici, uče pri dnevnoj svjetlosti, pješače makadamom po nekoliko kilometara i dobijaju dobre ocjene. Na pitanje od čega žive kažu da ni sami ne znaju. Kad rodi imaju po nešto voća, povrće proizvedu u svom vrtu. „I eto tako živimo!” Neke porodice imaju po nekoliko ovaca, neke kravu, a kuće su najčešće velike i nedovršene, pravljene

uz pomoć donacija ili rodbine iz inostranstva. Dok razgovaramo sa domaćinima često im se na licu vide izvještačen osmijeh i iskrena suza. Upitah jednu ženu zašto plače, a ona reče: „Plačem zato što nemam. Polomismo se ja i muž i ovo dvoje starije djece po šumi tražeći gljive i druge šumske plodove od rane zore do mrklog mraka, a zarada skoro nikakva. Da nam je u preduzeće, pa da imamo redovna mjesečna primanja da bar ovu mlađu djecu školujemo.” Ovih dana smo Fadila i ja obilazili porodice oko Zvornika. Mjesto Grbavci, vjerovatno dobilo ime po terenu koji je sastavljen od brežuljčica. Ljudi veoma radni, ali siromašni.

Njiva dvije-tri, hiljade kvadratnih metara ne može ishraniti petero - šestero članova porodice. „Kuće većinom napravljene uz pomoć donacije. I dok su se pravile moglo se i zaraditi po koja dnevnic, a sad kako se ništa ne gradi nema se vala odakle stići marka” reče mi Meho. „Eh da hoće ko otvoriti kakvo preduzeće pa da se ova mladež zaposli, ovako Boga mi me strah da mi djeca ne počnu krasti i otimati jer glad očima ne vidi.” „Bilo je dobro, što reče moj Meho, ali svake godine sve je teže!” izusti u jednom dahu Mehova žena. Dok se vozim prema Vogošći odzvanjaju mi riječi: „... ali svake godine sve je teže.” Slično sam čuo i u Mostaru, Čapljini, Bugojnu... I sve mi više dolaze u sjećanje te rečenice. Da nam je gdje u preduzeće, da hoće ko ovu mladež zaposliti...”



Ramo Hastor

NOVI PRIJATELJI FONDACIJE HASTOR

Izuzetno nam je drago što su potencijal Fondacije Hastor prepoznale i kompanije: Eurofarm Centar d.o.o. Sarajevo, Verso d.o.o. Sarajevo i Emna d.o.o. Sarajevo, i odlučile nam se pridružiti u osnaživanju mladih na njihovom putu ka uspjehu!



EUROFARM CENTAR

VERSO

EMNA d.o.o.



Kid's festival 2016



„Fondacija Hastor prati svoje đake tokom cijele godine, tokom godina. Uvijek smo u situaciji da pomognemo, da uputimo. Kod nas je ugovorom obavezno volontiranje, što znači da se djeca ugovorom spremaju za život, a život nije lahak.“

Ramo
Hastor

/ STIPENDISTA MJESECA

AMRA IMAMOVIĆ

Zbog izuzetnog truda i zalaganja u svim aktivnostima Fondacije Hastor, a posebno zbog bezuvjetne spremnosti da se našoj Fondaciji stavi na raspolaganje u bilo kom trenutku, ovomjesečnu titulu stipendiste mjeseca ponijela je Amra Imamović.



Amra je rođena u Sarajevu 1995. godine gdje je i završila osnovnu i srednju ekonomsku školu sa prosjekom 5,0. Trenutno je druga godina na Ekonomskom fakultetu u Sarajevu, odsjek Ekonomija. Ističe kako se na ovom smjeru vrlo dobro snalazi, te kako u jednu ruku napokon ispunjava svoj san. U slobodno vrijeme voli da čita, a najveći odmor pronalazi u slikarstvu. Također voli i jezike, tečno govori engleski, nešto manje njemački, grčki i španski. Pored mnoštva fakultetskih i porodičnih obaveza, vremena uvijek nađe i za obaveze u Fondaciji Hastor. Do novembra prošle godine, za našu Fondaciju volontirala je u srednjoj školi u Hadžićima. Trenutno je članica administrativnog tima Fondacije Hastor. „Vrlo je lijepo biti član jedne ovakve fondacije koja mi ne pruža pomoć samo finansijski. Pomaže mi u razvijanju mnogih lijepih navika kao što su odgovornost, komunikacija, stvaranje prijateljstava, te upoznavanje novih ljudi. To je ono što me ispunjava i što mi daje vjetar u jedra.“ Nadamo se da će Amra nastaviti nizati još novih uspjeha, te da će kao i do sad ostati ponosni član Fondacije Hastor.

Hanka Mujkić

/ RAD MJESECA



AMNA VILAJET

Bugojno